

## SCRIPT OF MORNING GOJRI NEWS BULLETIN 26DEC 2025 1015HRS

مارننگ گوجری نیوز بولیٹن 26 دسمبر 2025

\*\*\*\*\*

یوہ آکاشوانی جموں ہے باغ علی طاہر تیں خبر سُنو۔

\*\*\*\*\*

### LG VARANASI VISIT

لیفٹیننٹ گورنر منوج سنہا نے کل اک معروف سماجی لیڈر تے بارس ہندو یونیورسٹی غی طالب علمان غی یونین غا صدر بابوب مارکنڈیا سنگھ نانہہ خراج عقیدت پیش کیو وارانسی مانہہ اس سلسلہ مانہہ منعقدہ اک تقریب مانہہ بولتا وائے لیفٹیننٹ گورنر نے بابو مارکنڈیا سنگھ غی زندگی ور لوہ پائی اُن غو کہنو تھو جے بابو مارکنڈیا سنگھ نے نوجوانان نانہہ مسم ارادہ حکمت تے لگن بارے رہنمائی عطا کی اُن غی زندگی قوم غی تعمیر مانہہ نوجوانان نانہہ راغب کرن غی خاطر مستعل راہ ہے وے صاف ستھری سیاست غی علامت غا طور ور جانیائیں جنیں غا تے اُن غی زندگی سائنسی افکار نانہہ فروغ دین تے انسانیت غی گہرائی سنگ خدمات کرن غو اک انوکھو امتزاج ہے۔

\*\*\*\*\*

### LG JKP REC RULES

لیفٹیننٹ گورنر منوج سنہا غی قیادت آلی انتظامیہ نے جموں کشمیر پولیس غا ماتحت خدمات بارے پھرتی ضابطان 2025 غا مسودہ نانہہ عوامی دائرہ مانہہ پیش کیو ہے تانجے فریقین تیں اعتراضات تے تجویز حاصل کی جاسکیں واضع رہ جے جموں کشمیر پولیس بارے ماتحت پھرتی ضابطان 160 مانہہ ترمیم کی جانی مطلوب ہے وزارت داخلہ غی طرفوں جاری کیا گیا اک سرکاری حکمنامہ اس مسودہ ضابطان نانہہ وزارت غی سرکاری ویب سائٹ ایچ ٹی ٹی پی ایس ڈبل سلیش ڈاٹ جے کے ڈاٹ گوو ڈاٹ ان ور اپیلوڈ کیو گیو ہے تانجے مسودہ نانہہ آخری شکل دتا جان تیں پہلاں عوامی حلقان تیں رائے حاصل کی جاسکے فریقین تیں اپنا اعتراض تے تجویز نوٹس شائع ہون غے 15 روز غے اندر اندر دین واسطے کہیو گیو ہے تے اس غے بعد کوئے اعتراض یا تجویز قابل قبول نی وے غی۔

\*\*\*\*\*

### AI ENABLED SECURITY GRID

پاکستان غی ہمایت آلی دہشت گردی تیں ملن آلی لگاتار تمکیاں غے پیش نظر اندرونی سلامتی نانہہ مضبوط بنان غی خاطر جموں کشمیر پولیس نے جدید مصنوعی زبانیت متعارف کران غو اعلان کیو ہے آکاشوانی جموں گا نمائندہ نے جانکاری دیتا وائے دسیو ہے جے آئندہ غو نظام یو ٹی غا اندرونی تے سرحدی علاقان مانہہ نگرانی خفیہ جانکاری اکٹھی کرن تے اس ور فوری رد عمل دین غا طریقہ کار ور مبنی ویگو جہیڑو قانون نافذ کرن آلا اداران واسطے مجموعی ٹیکنالوجی غا اعتبار سنگ اک نمایاں ترقی غو حامل ویگو اس سلسلہ مانہہ حال ہی مانہہ رائے پور مانہہ پولیس غا ڈائریکٹر جنرل تے انسپکٹر جنرل غی ہوئی پین انڈیا کانفرنس غے دوران ہوا غور غے بعد سرکار نے اس گل غو فیصلو کیو ہے جے سلامتی صورتحال نانہہ

بہتر بنان غی خاطر اخلاقی ضابطاں نانہ قائم رکھتاواں جدید ٹیکنالوجی غی سہارو  
لیو جائگو۔

\*\*\*\*\*

## IB SECURITY HEIGHTENED

حفاظتی دستاں نے جموں تے پنجاب غا جموں سنگ ملحقہ ضلعان مانہ دراندازی  
غی کوششاں بارے خفیہ سو ملن غے بعد نگرانی مانہ بابدو کردتوہے آکاشوانی  
جموں غا نمائندہ نے جانکاری دیتا واں دسیوہے جے جموں سانہ تے کٹھوعہ  
ضلعان تے پنجاب غا سرحدی ضلعان مانہ حفاظتی بندوبست مانہ مزید بابدو کردتو  
ہے حفاظتی نگرانی مانہ یوہ بابدو قریب اک مہینہ توڑی کہنا کورا غا اندیشاں غے  
پیش نظر کیو گیوہے کیونجے اس غو فائدو خصوصی طور ور نواں سال غی آمد  
غے پیش نظر دراندازاں غی طرفوں چایو جاسکے۔ خفیہ جانکاری مانہ دسیو گیوہے  
جے پاکستانی علاقہ مانہ بیٹھا گج دہشت گرد پنجاب غا رستہ تیں وی دراندازی  
کرسکیں کیونجے آئندہ گج روز غے دوران پٹھانکوٹ تے گورداسپور جیسا علاقان  
جہیزا کٹھوعہ ضلع غا ملحقہ ضلع این ان مانہ کہنی تند پین غو فائدو چایو  
جاسکے۔

\*\*\*\*\*

## VDG's TRAINING

فوج غی سابرا برگیڈ گئی طرفوں گرائیں حفاظتی گارڈز نانہ پرمنڈل جموں مانہ منعقد  
کیا گیا اک تربیتی پروگرام مانہ پیشہ وارانہ تیاریاں تے حفاظتی دستاں سنگ رابطاں  
گی پاراش مانہ ٹریننگ دتی گئی آکاشوانی جموں غا نمائندہ نے دسیوہے جے اس  
تربیتی پروگرام غے دوران وی ڈی سیز نانہ پیشہ وارانہ صلاحیتاں نانہ بدھان غی  
تربیت دتی گئی جن مانہ ہتھیاراں غا استعمال فائرنگ تے جنگ غی بنیادی تربیت  
غی مشق بارے دسیو گیو ٹریننگ غے دوران لوکاں غی حفاظت خاصکر غے حملان  
غی زد مانہ آن آلا سرحدی تے گرائیں علاقان غی حفاظت بارے تربیتی جانکاری  
مہیا کرائی گئی فوجی عہدیداراں غو کہنو تھو جے ایسا تربیتی پروگراماں غا انعقاد  
غو مقامی حفاظتی گروپاں تے فوجی دستاں بشکار بہتر تال میل غو اک اہم کردار  
ہے۔

\*\*\*\*\*

## BEST KVK KATHUA

کرشی وگیان کیندر کٹھوعہ نانہ کرشی وگیان کیندر جموں کشمیر غا سب تیں بہترین  
کرشی وگیان کیندر قرار دتو گیوہے یوہ ایوارڈ سکاسٹ جموں مانہ آئی سی اے آر  
انسچیوٹ لدھیانہ غی طرفوں 22 دسمبر تیں 24 دسمبر توڑی منعقد کی گئی سالانہ ذونل  
ورکشاپ غے دوران دتو گیو اس ایوارڈ نانہ کے وی کے کٹھوعہ غا صدر  
سائنسدان ڈاکٹر وشال مہاجن نے حاصل کیو، ذون اول غے تحت یوہ ایوارڈ دتو گیوہے  
تے ان مانہ جموں کشمیر لداخ ہماچل پردیش پنجاب تے اُترکھنڈ غی ریاست تے  
یوٹیز شامل تھی۔

\*\*\*\*\*